



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

學校名稱 : 沙田培英中學
Name of School : SHATIN PUI YING COLLEGE
劇名 Name of Play : 有杕之杜，其葉萋萋
劇作者 Script writer : 聶只濬、吳卓昕(老師)

故事大綱 Synopsis :

有些回憶如細沙般悄然滑落，有些卻烙印般刻骨銘心。主角杜梓麟生於破碎家庭，親情的缺失使他渴望以愛情填補，卻又因此懼怕親密。夢魘輾轉纏綿，他終以藥忘記情愛帶來的痛楚。後來他遇見一生最愛,葉洛詩。兩人情投意合，但因杜梓麟的種種，兩人之間築起了無形的高牆，他和她的結局又該當如何？



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

序幕

(王醫生和陸醫生，分別從台左右出)

王醫：問世間，情是何物，

陸醫：直教人生死相許。

(二人指示一群小神祕醫生作出舞臺調動，小醫生們將第一場需要用的景和道具放好)

王醫：人生在世，你必然會經歷嘅又點會只得愛情呢！

陸醫：仲有親情，同友情！

王醫：喺一般嘅情況下，你一出世第一樣會感受到嘅就係——

二人：親情！

王醫：所以弗洛伊德嘅「童年決定論」講到，原生家庭對我地嘅影響係極其深遠。

陸醫：幸運嘅人用童年去治癒一生，

眾人：不幸嘅人用一生去治癒童年。



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

第一場

地點：心理輔導診所

(中年杜梓麟匆忙地走入診所)

中杜：(喘氣) 想問下呢度係咪葉醫生嘅診所？

護士：係啊，你係？(被打斷)

中杜：我係朋友介紹過黎睇葉醫生嘍，原本約咗下星期，但我有啲急事想——

(葉洛詩聽到出面有聲音，看見杜梓麟)

中葉：杜生？

護士：呢位先生佢——

中葉：Okay 呀。(向杜) 你入嚟先啦。

(杜梓麟急忙地進入房間)

中杜：(焦急) 唔好意思呀咁急搵你！因為我搵到我以前嘅一張相啊！(葉洛詩示意杜梓麟冷靜) 葉醫生你咪識催眠呀，你幫一幫我啊，我好想記得返呢個女仔係邊個！你睇下，呢個男人係我啊，但呢個女仔...我完全冇印象，左下角嘅日期好蒙，我睇唔到。(伸手給予相片)

中葉：(拿著相片，沉默一會) 2001 年 12 月 24 日。

中杜：(自言自語) 2001 年 12 月 24 日...

中葉：點解你咁想知道佢係邊個？

中杜：我屋企一張相都冇，就係得呢張。好似我刻意想提自己，唔好忘記佢。(哀求) 葉醫生，唔該你啦。

(葉洛詩嘆了口氣，拿出了催眠用具)

中葉：好，你而家望住呢支筆嘅筆尖，放鬆，由頭到腳都放鬆，好似躺喺床上面咁。

(杜梓麟閉上眼睛，放鬆)

中葉：請你幻想面前有一條樓梯，你一步一步咁行落去，呼吸保持一呼一吸。

(杜梓麟被催眠)



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

第二場

地點：杜梓麟的回憶世界

回憶一

(幼年杜梓麟躺在床上，他被惡夢驚醒)

幼杜：(懼怕) 爸爸媽媽，你哋喺邊啊？

(舞台另一邊背景聲開始加重，是兩把聲音在爭吵。是客廳傳來的)

幼杜：爸爸？媽媽？(聽到聲音)

父親：(拿著離婚協議書) 離婚呢啲嘢唔係攞嚟玩㗎！

母親：我唔係玩，我諗得好清錯。

父親：咁個仔點算？佢而家先五歲，無咗個阿媽對佢好大影響㗎！個仔你都有份㗎，盡返自己嘅責任好唔好？

母親：我有話唔要個仔㗎！

父親：你想要個仔就留低，以後唔好再提離婚呢兩個字！

回憶二

母親：我出去。

父親：今日喺個仔嘅生日。

母親：我約咗朋友啊！

父親：咩朋友啊？“男性”朋友？

母親：鬍線！

父親：究竟個仔緊要啊定你啲“朋友”緊要啊？

幼杜：你地又嘈咩啊？

母親：(同時) 生日快樂！

爸爸：(同時) 生日快樂！

幼杜：(抱著他們倆) 多謝爸爸媽媽！

母親：今年有咩生日願望？

幼杜：我希望爸爸媽媽以後都開開心心，我地三個可以去玩，爸爸媽媽之後都會陪住我。

(母親和父親你眼望我眼，沉默)



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

回憶三

(幼杜身體不適，一人坐在休息室，等待父母接他回家)

(母親和父親的電話對話)

母親：學校有冇打俾你？我做緊野行唔開，你去接阿麟啊？

父親：我究開緊工喎！

母親：你份工做唔做都吧啦！

父親：哈！搵得錢多就大晒啊？

母親：咁宜家個仔發高燒你係咪唔理啊？！

(另一邊廂老師上前安撫幼杜)

老師：梓麟你喺咪好唔舒服？

(幼杜微微點頭，流露出痛苦的表情)

老師：我哋聯絡唔到你嘅家長，會唔會有其他人可以接你？

(幼杜搖頭)

回憶四

父親：講咗話唔好再提離婚喇嘛！係咪我搵錢唔夠多？我做多幾份工，你想做咩都得啊？識返屋企就得喇！你想點你講啊！

母親：我已經忍咗好多年，忍到阿麟升中——

父親：(崩潰，捉著母親) 呢個屋企無咗你唔得喇！

母親：你俾我走啦.....

父親：(跪在地上哀求) 我有啲咩做得唔好？我改啊，唔好離開呢個屋企，我真係好愛你喇，無咗你真係唔得喇。(叫杜梓麟過來) 阿麟，阿麟！出嚟一齊求媽咪唔好走。

母親：你唔好利用個仔.....

幼杜：(睡眼惺忪) 咩事啊？

(父親拉著幼年的杜梓麟跪下，一起求著母親不要離開)

父親：媽咪要丟低我哋，你快啲求媽咪唔好走！

幼杜：(害怕) 媽媽，唔好走啊！你話過會一直陪住我喇！

母親：(緊扼著幼杜的手) 對唔住.....

(母親轉身離開，父親跪在地下痛哭)

幼杜：(顫抖) 爸爸.....

父親：(抱著幼年杜梓麟) 麟仔，你聽我講，唔好愛任何人，出面無個好人！千祈唔好好似老豆咁傻！知唔知啊？唔好愛任何人！



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

(青年杜梓麟及杜梓麟出，燈光打在幼年，青年，中年杜梓麟和杜梓麟)

四人：唔好愛任何人！